



Lëtzebuerg, de 15. Abrëll 2024

Här President,

Esou wéi d'Chambersreglement et virgesäit, bieden ech lech, dës parlamentaresch Fro iwwert **d'Förderung vun der Innovatioun an der Landwirtschaft** un **d'Madamm Minister fir Landwirtschaft, Ernährung a Wäibau** weiderzeleeden.

D'Ënnerstëtzung vun der Innovatioun an der Landwirtschaft an am Wäibau ass en essentielle Pilier fir den nächste Generatiounen vu Landwirt:innen nei a villfältig Méiglechkeete vu Liewensmëttelproduktioun opzemaachen, déi souwuel ressourcëschonend wéi och wirtschaftlech sinn. Landwirt:innen a Wënzer:inne brauchen déi néideg Ënnerstëtzung fir hir innovativ Projetsiddien z'entwéckelen an ëmzesetzen.

Fir d'Innovatioun am landwirtschaftleche Beräich virunzedreiwen huet ënnert der virechter Regierung de Landwirtschaftsministère am Juni 2023 eng Kooperatioun mat Luxinnovation lancéiert. Mat der Ënnerstëtzung vun engem Innovatiounsberoder kréie landwirtschaftlech Betriber soumat e besseren Accès op Wëssen, op technesch a finanziell Ënnerstëtzung, Reseauen, asw, an hunn esou och besser Méiglechkeete fir innovativ Usätz ze entwéckelen an op hirem Haff ëmzesetzen.

Zousätzlech gëtt et eng Kommissioun fir d'Promotioun vun der Innovatioun, der Fuerschung an der Entwécklung vum Agrarsecteur, déi eng Innovatiounsstrategie soll entwéckelen a Rechercheprojete soll aviséieren.

Ënnert dem Agrargesetz ginn et aktuell dräi Finanzéierungsinstrumenter fir Innovatiouns- a Fuerschungsprojeten an der Landwirtschaft : 1) d'Europäesch Innovatiounspartnerschaft, 2) d'allgemeng Fuerschungsbäihëllefen an 3) d'Demonstratiouns- an Ubauversich.

Laut dem Rapport d'activité vum Landwirtschaftsministère goufen 2023 4 Projeten an der Kategorie 'Europäesch Innovatiounspartnerschaft' ënnerstëtzt, sou wéi 9 Rechercheprojeten an 9 Demonstratiounsprojeten.

Fir de Wëssens- an Innovatiounssystem op nationalem Niveau ze verbessere gouf zousätzlech op eng extern Berodung zeréckgegraff, déi Recommandatiounen ausgeschafft huet.

An hirem Regierungsprogramm seet d'Regierung dass si innovativ Projete weider wëll ënnerstëtzen, notamment iwwert d'Weiderféiere vun der europäescher Innovatiounspartnerschaft, fir esou innovativ Léisungen op d'Defië vun der Landwirtschaft z'entwéckelen.

An dësem Kontext erlaben ech mer folgend Froen un d'Madamm Minister ze stellen:

1. **Wei vill Sue sinn an de leschte 5 Joer vum Landwirtschaftsministère an d'Förderung vun der Innovatioun gefloss iwwert déi 3 jeeweileg Finanzéierungsinstrumenter ? Sinn doriwwer eraus nach finanziell Moyenen an d'Förderung vun der Innovatioun investéiert ginn, a wa jo, wéi vill ? Wéi vill vun dëse finanzielle Moyenen am Beräich vun der Innovatioun sinn a Projete gefloss déi d'Zil hate ressourcëschronend an ëmweltfrëndlech landwirtschaftlech Praktiken z'entwéckelen oder ze förderen ?**
2. **Wat sinn der Madamm Minister hir Prioritéitsberäicher fir d'Innovatioun an der Landwirtschaft an dem Wäibau an dëser Legislatur ze förderen ? Begräifen dës zB. nient innovativen an nohaltege Produktiouns- an Ubaumethoden och d'Vermaartung vun nationale Produkter ? Wéi vill finanziell Moyene solle bis 2027 all Joer an d'Stärkung vun der Innovatioun an der Landwirtschaft fléissen, an iwwert wéi eng Budgetsartikelen ?**

Mat déiwem Respekt,



Joëlle WELFRING
Députéiert



LE GOUVERNEMENT
DU GRAND-DUCHÉ DE LUXEMBOURG
Ministère de l'Agriculture,
de l'Alimentation et de la Viticulture

**Äntwert vun der Ministesch fir Landwirtschaft, Ernährung a Wäibau op d'parlamentaresch Fro n° 610
vun der éierbarer Deputéiert Joëlle Welfring**

1. Wei vill Sue sinn an de leschte 5 Joer vum Landwirtschaftsministère an d'Förderung vun der Innovatioun gefloss iwwert déi 3 jeeweileg Finanzéierungsinstrumenter ? Sinn doriwwer eraus nach finanziell Moyenen an d'Förderung vun der Innovatioun investéiert ginn, a wa jo, wéi vill ? Wéi vill vun dëse finanzielle Moyenen am Beräich vun der Innovatioun sinn a Projekte gefloss, déi d'Zil haten, ressourcëschronend an ëmweltfrëndlech landwirtschaftlech Praktiken z'entwéckelen oder ze förderen?

D'Ënnerstëtzung vun der Innovatioun an der Landwirtschaft an am Wäibau ass essentiel fir och nach an Zukunft kënnen eng modern a nohalteg Landwirtschaft ze garantéieren, an dëst bei engem steigende Liewensmëttelbedarf a verännerten Ernierungsgewunnechten an engem Kontext vum Klimawandel. Fir d'Landwirtschaft bei der Bewältegung vun dësen Defien ze ënnerstëtzen, waren am 'alen' Agrargesetz dräi Finanzéierungsinstrumenter fir d'Innovatioun virgesinn.,

Iwwert d'Period 2019-2023, huet de Landwirtschaftsministère am ganze 7.639.612€ Subventiounen ausbezuelte fir d'Förderung vun Innovatiounsprojeten, wovun 6.319.293€ a Projekte gefloss sinn, déi ausschliisslech d'Zil haten, ressourcëschronend an ëmweltfrëndlech Praktiken ze entwéckelen.

Opgeschlësset jee no Finanzinstrument:

- Agrargesetz vum 27 Juni 2016
 - Artikel 38: 1.096.533€ fir d'Ënnerstëtzung vun den Demonstratiouns- an Ubauversich
 - Artikel 40: 2.281.192€ fir d'Ënnerstëtzung vun den Europäeschen Innovatiounspartnerschaften
 - Artikel 43: 2.730.034€ fir allgemeng Fuersuchungsprojete.

Dëst mécht also 6.107.759€, déi aus dem Agrarfong finanzéiert gi sinn.

- Dobäi kommen dann nach:
 - 1.216.853€ fir Projeten an de Beräicher Sprétmëttelreduzéierung a Buedemfruchtbarkeit
 - 180.000€ fir den Opbau vu Wertschöpfungsketten, 25.000€ fir Bio-Demobetriber a ronn 110.000€ fir verschidden Aktiounen ronderëm Bio-Zorteversiche. Dëst alles fir d'Bioprimärproduktioun ze stäerken.

Dëst mécht zesummen 1.531.853€, déi iwwert Budgetsartikelen finanzéiert gi sinn.

Doriwwer eraus huet de Landwirtschaftsministère och eng Collaboratioun mam Fonds National de la Recherche lancéiert fir de Secteur mat thematescher Fuersuchung an dräi spezifeschen

Themeberäicher ze ënnerstëtzen:

- d'Adaptatioun vun der Lëtzebuurger Landwirtschaft un de Klimawandel
- den Impakt vu lokal landwirtschaftlech Praktiken op Waasserressourcen
- den Impakt vu lokal landwirtschaftlech Praktiken op Biodiversitéit an Ökosystem-Service an Agroökosystemer.

Aktuell gi 4 Projeten iwwert dës Kollaboratioun ënnerstëtzt fir d'Period 2023-2026, an en total Montant vun 2.697.928€.

Am Laf vun 2023 huet de Landwirtschaftsministère eng Konventioun mat „Luxinnovatioun“ ënnerschriwwen fir vir- a nogelagert agro-alimentaire Entreprises aus dem Secteur bei der Innovatioun ze ënnerstëtzen. Käschtpunkt fir 2023: 67.800€.

2. Wat sinn der Madamm Minister hir Prioritéitsberäicher fir d'Innovatioun an der Landwirtschaft an dem Wäibau an dëser Legislatur ze fërderen ? Begräifen dës z.B. nient innovativen an nohaltege Produktiouns- an Ubaumethoden och d'Vermaartung vun nationale Produkter ? Wéi vill finanziell Moyene solle bis 2027 all Joer an d'Stärkung vun der Innovatioun an der Landwirtschaft fléissen, an iwwert wéi eng Budgetartikelen ?

Am aktuellen Agrargesetz ass iwwert den Artikel 70 eng Kommissioun fir d'Promotioun vun der Innovatioun, der Fuerschung an der Entwécklung vum Agrarsecteur virgesinn, déi d'Prioritéite fir d'Fuerschung an d'Innovatioun fir d'Landwirtschaft an de Wäibau definéiert.

Aktuell ënnerstëtzt de Landwirtschaftsministère mat senger Politik Fuerschungs- an Innovationsprojeten an de follgende Beräicher:

- Adaptatioun un de Klimawandel
- Schutz vun natierleche Waasserressourcen
- Reduktioun vu Pestiziden
- Erhaltung a Promotioun vun der Biodiversitéit
- Protein- an Energieautonomie
- Reduktioun vun der Benotzung vun Antibiotika
- Déiereschutz
- Buedemschutz
- Diversifikatioun vun der Landwirtschaft an Ausbau vun neie Produktiounszweigen
- Kreeslafwirtschaft a Wertschöpfungsketten
- Digitaliséierung an der Landwirtschaft

Bis 2027 huet de Landwirtschaftsministère 12.815.057€ ageplangt fir d'Innovatioun ze ënnerstëtzen. Dës Finanziell Moyene sollen, nieft de Kollaboratioune mam Fonds National de la Recherche a Luxinnovatioun, iwwert d'Artikele 67, 68 an 69 vum Agrargesetz vum 2. August 2023 ausbezuelte ginn.

Lëtzebuerg, den 8. Mee 2024

D'Ministesch fir Landwirtschaft, Ernährung a Wäibau

(s.) Martine HANSEN